

十

程

安慶府

在南京西南七
百四十五里

領縣六

古皖國偃姓咎繇之後亦春秋舒桐二國地也楚滅之兩漢爲皖縣屬廬江郡孫權得之遂稱重鎮晉末安帝立懷寧縣於此兼立晉熙郡隋改熙州煬帝爲同安郡唐改舒州治皖至德初又改盛唐郡乾元至宋初俱名舒州政和爲德慶軍後因陞康州爲德慶府改本軍爲安慶軍復以寧宗潛邸陞府國朝沿其名○高啓登安慶城樓詩層構初成百戰終憑高應喜楚氛空山隨粉堞連雲起江引清淮與海通遠客帆檣秋水外殘兵鼓角夕

陽中時清莫問英雄事回首長煙滅去鴻○按古
 郡城在治北二十二里皖山所謂皖陽城也遷於
 潛山縣不詳何時疑唐乾元以後宋政和以前至
 理宗時北兵日逼以城離江遠議欲保江乃遷城
 於盛唐灣宜城渡即今理也渡在康濟門外相傳
 郭璞過此指其地曰宜城云○郡縣志云漢廬江
 郡統縣十二有皖有潛有舒有龍舒又舒有五名
 曰舒曰龍舒曰庸舒曰舒鳩曰舒城其實一也亦
 名羣舒皆今郡之地司空文明詩云古國羣舒地
 前當桐柏關○唐舒州壁記云本州刺史多用名
 德之士為之舊相則李班文章則獨孤及李翱敏
 亮則知謇武烈則張萬福于斯為烈○唐書列傳
 武德六年皖人鎮周都督舒州既入城就故宅市
 酒殺召親戚與之酬飲散髮箕踞如布衣時凡十
 日既而分贈金帛泣與之別曰今日鎮周猶得與
 故人歡飲明日則舒州都督治百姓耳自是親戚
 故人犯法一無所縱境內肅然○刺史吳兢浚儀
 人自洪州坐累降舒州兢初任史局敘事簡核號
 良史云○張籍字文昌以國子司業出仕舒州從
 事善詩文韓愈薦之于朝○宋蘇軾改舒州團練

安慶府志 卷之七
 事善詩文韓愈薦之于朝○宋蘇軾改舒州團練

副使黃庭堅起知舒州俱未赴

懷寧縣

附郭

晉安帝以永嘉荒亂之後立縣以懷寧茲土也舊治在皖隨郡遷移宋景定中始定今所縣正東城門曰樅陽以古樅陽鎮爲名數百步有呂蒙城今故倉址是其處吳襲魏呂蒙所築其城臨江○臨江水驛曰同安取同安郡爲名元吳草廬臨江仙詞云去歲家山重九日西風短帽蕭疎如今景物幾曾殊舒州城下月未覺此身孤末題云九日舟泊安慶城下晚謁臨江水驛于時月明風清水共

天碧情景佳勝與徐道川方復齋祝肩吾方靖之驛亭草酌子文京侍○城西門曰正觀數百武爲清水塘其水東流入大江元余忠宣闕死節於此後名盡忠池闕字廷心爲淮西宣慰副使分治安慶時淮東西城多陷獨公繕守孤立六年至正丁酉陳友諒大合衆來圍戍戍城陷猶率衆巷戰身中三矢友諒令人呼余將軍何在吾將官之闕戟手大罵自刎沈塘中妻子女相率赴井死今城東北街所稱風節井是也諸將士大慟曰余將軍不負國我輩可負余將軍乎從而死者千餘人○忠

宣姪壻李宗可斬人嘗文其身號花李城旣陷獨
橫槊入賊陣殺數十人而還謂妻子曰余將軍死
節吾亦當死汝等無苟活不分少長咸殺之解甲
據胡床飲酒至醉自刎死○寰宇記云皖口在城
西十里一名山口鎮唐李涉嘗過此遇盜盜知涉
有詩名索贈詩云春雨瀟瀟江上村綠林豪客夜
知聞他時不用相迴避世上于今半是君按皖水
在縣西北壽州霍山縣界流入經縣北二里又東
南行二百四十里入大江謂之皖口○長風沙在
治西北四十里李太白詩早晚下三巴預將書報
家相逢不道遠直至長風沙元楊載詩長風沙風
沙不斷行人憎柰君何南風正高北風起大船初
灣小船喜小船移近大船頭不獨風波夜可憂但
祝行人好心事長江何處是安流荅舍參差數株
柳時平尚置官軍守青裙老姥詫鮮香白髮殘兵
賣私酒按大江自小孤來城西南遶而東下池州
接無爲州界凡百餘里中央是長風鎮舊有戍兵
以防寇盜今設巡司○大龍山在治北二十里相
接有小龍山翩然瞰江延蔓五十餘里山上有嶺
石脊隆起名春現嶺又名集賢嶺今城北門亦曰

集賢明也元余闕自集賢嶺入大龍詩院公揭楚
甸茲嶺孕奇形翠積樅江上崇冠呂蒙城戒途入
中林平岡駐我旌延崇失來術周覽多所經峩峩
石窓轟宵宵巖岫冥踈踈朝雲齊燦燦晨星明彎
弓射鳴鴈羣谷振弦聲仰憐山人居俯閱洞下耕
蒼龍候春啓金虎收光晶權家既匪學農用或可
明願言同載者爲爾鑄阿兵王煜詩云同安城北
山萬里西曰大龍東小龍長松澗底結琥珀秀峰
雲表開芙蓉杖藜每供野老至採藥或與仙人逢
有時乘興臨絕頂俯視喑嘍但凡庸○東山在縣

東二十里上有靈觀石壁上刻云閉於元封元年
開於元豐元年不知何義本觀有道士李斯立能
詩嘗從蘇子瞻遊年踰八袞如巖溜連雲凍溪梅
帶雪香之句最爲坡公所賞○志云縣大豐鄉法
雨菴右有古洞石壁如屋仙迹存焉古洞之左有
盤雲巖雲起卽雨○阜民坊有永慶寺范文虎故
宅也元時產並蒂蓮賜額永慶雙蓮寺 本朝景
泰中復產雙蓮有超然亭元虞集詩超然之亭何
所起雙蓮古塔共岩堯城頭踈雨散花至江外斷
雲將樹遙○木榴寺在壽泉鄉唐伏虎禪師建三

城寺在綠水鄉宋伏虎禪師建余闕送僧康普明
任三城寺詩嘗登火龍嶺橫梁望四方原野何蕭
條白骨紛交橫樅陽將解甲皖城寢開疆耕夫務
南畝士女各東桑念子中林士振策亦有行我聞
三城美龍嶺在其傍連林卽脩阻下有陰湖光明
當洗甲兵從子臥石床○縣大豐鄉纍纍十餘里
皆疑冢其盡處有大阜爲晉陵坂土人墾田見其
下有石門而止相傳爲晉代陵墓或云晉熙郡以
此名○欽化鄉有太子墩相傳魏武帝至此生子
令三軍聚土爲墩以紀之○漢地理志云皖有鐵

官鑄鐵作牛埋於城北十步以鎮壓也北史齊皇
建二年刺史王洪遣掘皖鐵牛舉入城將鎔鑄爲
兵于時城中人馬多死問巫覡咸曰鐵精爲祟遂
使人送牛本處當埋之地時土没牛六寸自頃以
來牛現出地一尺五寸○城塚記云廢皖縣在古
逢龍城內按魏志臧霸討吳將韓當當引兵逆戰
於逢龍卽此地以居浣水之北號爲皖城濠塹今
尚依然○廢安樂城在縣南二十里在武功城內
梁天監七年大將武會置遂號武功○廢梅縣城
在縣北七十里龍鳴城內其城齊天統三年行臺

右丞盧潛屯兵於此於時龍鳴城內潛以為不祥
 移軍在外乃號龍鳴城○廢石潭鎮在縣東八十
 里北齊皇建二年立齊梁二國兩界相鄰梁數稱
 兵互相侵逼齊乃立鎮以相防禦陳太建五年廢
 唐武德五年王弘讓復置八年又廢○碑目云同
 安志宋錢紳編續同安志蔡時編○舒州新堂銘
 唐李翱撰○集古錄云四絕碑在舒州唐李陽水
 撰并李華文張從紳書

桐城縣 在府城東北
百五十里

漢時廬江郡有樅陽縣即此隋開皇中改同安縣

以縣東門內有同安故城也唐至德初取桐鄉之
 義改今名宋末徙治樅陽鎮又徙池之李陽河元
 始還舊治○漢樅陽城在縣東南百二十里臨江
 即今樅陽鎮武帝紀云元封五年南巡狩自潯陽
 浮江射蛟江中獲之舳舻千里薄樅陽而出作盛
 唐樅陽之歌今本鎮有射蛟臺是按樅音宗松葉
 而柏身樹直上或古昔有此樹故名志云樅陽鎮
 有惜陰亭以晉陶侃嘗駐此又有達觀亭黃庭堅
 讀書其上後人因各為亭以美之○盛唐山在縣
 南五里又謂之益塘山酈道元云此水源東南流

經盛唐戎俗訛謂之小益塘也宋王安石詩開國
桐鄉已白頭國人誰復記前遊故情惟有寒塘水
轉入東南向我遊○漢書朱邑字仲卿廬江人少
時爲桐鄉嗇夫廉平不苛入爲大司農祿賜以供
九族鄉黨而家無餘財病革謂其子曰我故爲桐
鄉吏其民愛我死卽葬我桐鄉子從治命葬焉其
墓在治西南二十里石井舖西有唐元和碑李比
海書宋劉無言詩古木森森覆墓亭大農祠在古
桐城後來爲政應千輩能使斯民獨有情○方輿
勝覽云投子山在縣東三里上有投子寺唐大同
禪師開山相傳有三鴉伺曉玉虎巡廊又有雪峰
泉及仙姑井○傳燈錄大同禪師懷寧人居投子
山三十載徒衆千餘黃巢之黨至寺師爲隨宜說
化拜伏而去○考藝文內投子山有二詩三雄分
漢鼎郊野戰羣龍將軍偶敗此投子空山中劉興
言作也獨懷魯將軍兵敗携部曲來投衲子衣解
甲餘茂菽周美成作也其詩意似是爲孫吳魯肅
而詠山名投子或以此○縣西一里有太霞宮相
傳晉時裴阮郭三仙同遊邑中有霞光燭天之異
里人祀之呼爲太霞福地○縣北五里不動山宋

碧巖禪師道場也今移建治東名太寧寺○治東三十里法蕭院梁昭明太子讀書之所有祠存其寺額為唐宣宗筆○輿地紀勝云龍眠山在縣西北三十里與舒城六安太湖懷寧諸縣連界以山中有一龍井故名按今去縣西北六十里詳舒城下○名山記云浮山一名浮渡山在縣東九十里週迴五里其西南獨峰直上千仞大江環遶其勢若浮故名宋法遠禪師王之寺曰華嚴居妙高峰下基址寬廣為茲山巖洞首領○傳燈錄云遠師亦號遠錄公歐陽脩聞其名造訪之初不加敬與客基師出坐其傍歐遽撤基請教師即令搥鼓升座曰若論此事與奕棋相似敵手知音當機不讓若是綴三饒五又通一路始得有一般低基抵解閉門作活不能奪角衝關哽節與虎口齊彰局破後徒勞遑幹所以道肥邊易得瘦肚難求思行則往往失黏心麤而時時頭撞休誇國手謾說神仙羸局輸籌即不問且道黑白未分時一着落在甚麼處良久曰從來十九路迷悟幾多人所著有浮山實錄及九帶集年七十餘歸寂自稱柴石野人○寰宇記云符度山頂三巖下約容三五十人及

天井一所泉常如霹靂下通潑潭又有金穴采金者每見大蛇穴口嚇之自後不敢入按符音同涪浮亦音符與涪通用浮山者白地視之如蓄自江視之若浮不峻不麗巖壑相屬其中石態屈曲殊觀巖三百有五十峰七十有二其最著者山之南爲石龍峰蜿蜒猶龍人行龍脊上其東陸子諸巖聯綿如千步廊卽之纍如延之豁如謂之巖廊又南爲會勝巖洞如邃如可屋可樓景象萃如山巒翕如又東爲穿心巖空洞可數百武遊者出入焉又東下爲石門其門綽如又東南爲金谷巖高而敞其上有屋有塔西南有峰千仞巍然俯江又西上爲大通巖視諸巖尤勝有古砦有龍湫人謂之天池其水淵洄不溢不涸其內有浮菹壅積而生草水菼如鬱如其西下爲張公巖中有井甘而冽又其西爲西峰諸巖中有滴水巖其上有門僅可望天日坐其中冷然生寒久則毛髮灑然其南下漸平曠卽浮山也其週五里其高三里□右金谷巖橫十三丈濶五丈巍若倚空亦名金谷洞李龍眠居士序有云攜歸金谷洞中晏坐白雲巖下□大通巖一名滴水在金谷右門高狹而曲內故廣

圓翕然倒懸如旋螺狀當頂一竅可見天日昔大通禪師在此安禪石刻甚多□首楞巖在獅子口內可居十餘人高掛山巔湖山在目□會聖巖在翠蓋峰下深廣容數百人俗稱會勝以奇勝會集於茲也有陸務觀題刻□棲真巖在會聖之左可居數十人巖巔刻云開山和尚卯塔宋嘉祐庚子徐家市民陳文政建瘞開山僧涅槃骨於內一名伽藍洞□蓮花石在會聖之右石平如砥窪水處生出水芙蓉紅黃間雜如繪萬曆二十年始見遠近驟聞觀者日以千百計□穿心巖在胡麻溪發源處天然石版兩片聯屬其上如砥其下穹窿容數百人前後相貫如橋天雨時瀑水自中過又名仙人橋□談玄巖在金鷄洞上曲阿深廣前壁刻慶曆六年中秋遠公談玄於此□張公巖亦可容數百人內有天然石閣縱橫各二丈許前有夕陽樓衣帶溪山雲林迥目宋部使者張同之字野夫棄官隱其中傳聞辟穀丹成仙去□多景巖高深可丈餘四周石窟有若缶者有若杯者有若丸者縱橫交錯其約百有八蓋會三十六巖七十二洞之景而聚于卷石云□海島巖深廣約五丈許石

孔纍纍若蠶房若浮漚者以千萬計又有惟石若老叟控猿狀頂紋蒼翠卽海市蜃樓不啻也○雷公洞在石龍峰左深廣各四丈外壁有毛知遇石刻後壁有石井二穴建安雷鯉題爲丹井洞前有石池一泓如硯刻硯池二字○他如陸子巖有晉陶侃遺蹟碁盤石有唐孟郊橫雲洞有唐陵崑金鷄洞有元趙孟頫各題又石龍峰有巨人書迹不可勝紀而陶士行嘗爲樅陽令陸子名宰山陰人宋宣和時來遊云○青山在縣南一百里上有石屋晉裴仙修煉之所有金鷄洞石鼓諸勝○山山在縣東百二十里潁江上有煉丹池及風洞○城塚記云呂亭在縣北呂亭山下吳志呂蒙伐魯肅督西陵屯軍於此南畿志桐城東有呂亭左縣今呂亭驛是又二十三里爲西峽山魏太始二年張遼救皖聞城已破築壘峽南因名南峽戍○團亭湖在縣南六十里括地志云此水發源于南峽山東南百五十里與白石湖相連湖中有兩小山亭亭高峻白石皎然故有團亭白石之號注水經云樅陽湖水遶團亭與江水合而東流卽此處也又五里爲巢城其城三重又名重城南北川澤左右

陂湖○志云木鵝洲去縣百二十里大江北其租賦則屬池州相傳南唐與周世宗刈江為界先以木鵝浮江中隨其所之以定南北而木鵝乃循洲入小峽而下故此洲不隸江南○指廩坊在縣東魯碇三國時臨淮魯蕭寓桐城吳呂蒙嘗候之求資糧蕭家有兩困困三千斛乃指一困與之相傳蕭家在此又治南七十里魯鎮城亦子敬屯兵之所○紀勝云徐常侍廟在縣南百里地名連城四面石壁廟居湖上古木叅天居人言即徐騎省也按鉉字鼎臣仕南唐以直言貶舒三年其作龍門

寺記有曰頃歲謫居此邦思過三載云

潛山縣

在府西北百二十里

云

左傳昭三十一年吳侵潛楚沈尹帥師救潛即此地亦唐宋之舒州也今縣元至元中立即潛山為名○王象之紀勝云城樓有皖伯堂郡圃有如山堂潛峰閣天柱閣皆王荆公倅舒遊息之所其詩曰皖城終日靜如山府椽應從到日開一水碧羅裁繚繞千峰翠玉削孱顏舊遊筆墨苔今老浪走塵沙鬢已斑攬轡羨君橋北路春風橋上鳥關關○按荆公通判舒州文潞公為相薦其恬退乞不

次擢用以激奔競之風召試館職不就後封舒亦
 本意今學宮左側有舒臺本此畿志云皖山臺
 舒王臺今為天寧寺基舊有石其明如月○皖
 伯臺在太平寺皖伯周大夫也寺在太平山下故
 名李師中詩有云古寺連城邑蟠基載巨鰲地應
 迎曉日天不隱秋毫右去縣北五里口攷太平寺
 梁時建寺傍即王岐公讀書處太守朱綽為起英
 輔齋岐公諱珪成都華陽人徙居舒州之王家坦
 去縣東五里元余闕登太平寺詩蕭寺行春望下
 方城中雲物轉淒涼野人籬落通潛口賈客帆檣

出漢陽多難漸平堪對酒一樽未盡更焚香憑將
 使者陽春曲消却征人鬢上霜○寰宇記云唐呂
 涓刺舒州於城西一里築館以招嘉客踰山夾沼
 為最勝處名西溪館○紀勝云南湖在縣治南舊
 名南園三面依城故多喬木湖浸甚濶有南湖亭
 牽芳堂李師中記○稗志云縣東三里李家灣唐
 李靖寓宿之所按淮記李衛公布衣時道經舒州
 天晚路迷至一朱門投宿夜半有人扣門呼曰天
 帝命行雨王嬪得旨詣靖曰此非凡處龍宮也請
 先生代我行雨靖不及辭王嬪即出一馬一瓢付

靖教云馬嘶卽將瓢水滴鬣上如言代之一時平地水三尺湖廣石首縣亦載之○太平廣記漢永平十一年廬江郡皖侯國有湖皖民兒垂釣得黃物數十百枚卽掇拾以歸其父曰此黃金也與俱馳往鄰里聞之亦往共採得十餘斤乃偕赴守言其狀得賞而去○郡國志云喬公亭在縣北隔皖水一里漢末喬玄居此玄二女國色孫策克皖城納大喬周瑜納小喬後人於其居起亭曰秀英今爲雙溪院址傍有喬井相傳汲其水恒有胭脂色明高啓過二喬宅孫郎武略周郎智相逢便結君

臣義奇珠連壁照江東都與喬公作佳壻喬公雖在流落中門稍喜色雙乘龍大喬娉婷小喬媚秋水竝蒂開芙蓉二喬已嫁猶知節同手詩書自怡悅不學分香歌舞兒銅臺夜泣西樓月口畿志云漢太尉喬玄墓在縣七里彰法山廣教寺後玄與曹操友善嘗相誓他日後死過墓必下否則令腹痛故文選有車過腹痛之教口碑目云喬公亭記後唐保大十三年徐騎省鉉文乃篆書法甚古失其名集古錄云卽雙溪院記也周瑜祠在縣東二里其廟碑亦徐鉉所作周益公于州南園中覓得

舊址仍築宮祀之刻像繪壁自為立碑口紀勝云
擢秀閣乃陳瑩中讀書之所瑩中登第黃魯直名
而書之其登閣詩云築室皖公城木末置曲闌歲
晚對煙雨人家橋柳間獨秀司命峰衆丘讓高寒
松竹二喬宅雪雲三祖山哀懷抱絕景更覺落筆
難○圖經云縣之最著者有潛皖天柱三山以地言
之則曰潛山謂其遠近山勢皆潛伏也以國言之
則曰皖山謂皖伯所封之國也以峰言之則曰天
柱指其峰之最高者而名之也口漢郊祀志元封
五年冬南巡狩至于盛唐望祀虞帝于九嶷登瀟

天柱山應劭曰瀟音潛同南唐新書霍山在瀟縣
名也屬廬州徐靈期南嶽記曰衡山五嶽之南嶽
也至於軒轅乃以潛霍之山為副故爾雅云霍山
為嶽九域志云舒州潛山漢之南嶽○仝攷潛皖

天柱雖有三山之名至山椒則峭拔如柱屹然獨
尊只一峰耳三山之間寺一而宮二寺在梁寶誌
時曰山谷隋燦太師曰三祖唐乾元中重建曰乾
元其實一也宮曰真源唐天寶間刑宋政和曰靈
仙觀太平興國曰九天司命真君祠實梁武時白
鶴道人卜築之場道人即與寶誌公競術者又宮

一曰天祚萬壽宋宣和中始建今仍舊名曰皖山
圖序云潛山一名皖伯臺在縣西北二十里有峰
四曰飛來石榴獅子三台池二曰飲馬七星巖二
曰獅子老師洞四曰桃源石門梅隱黑虎右仙桃
崖絕巘中有桃一株其花五色其實可食故名黑
虎洞唐馬自然修道之處自然名湘鹽官人亦稱
馬祖曰天柱山其高以丈計者凡三千七百其週
以里計者凡二百五十漢武帝登封尊爲南嶽以
代衡山道家謂之司玄洞府九天司命真君主之
口爾雅注云霍卽天柱山潛水所出天柱亦名雪
山有峰六曰佛子蓮花登仙玉鏡臥虎月華亭三
曰青雲正宗步月橋一曰登真唐孤獨及詩早歲
慕五嶽嘗爲塵機礙孰知天柱峰今與郡齋對漢
皇南遊日望秩此昭配法駕到谷口禮容振荒外
燔柴百神趨執玉萬方會如今封禪壇惟見海雲
晦自註云封禪壇在天書峰上頂天書炳耀遊人
隱隱見之朝天峰時有雲鶴迴翔其上卽天柱峰
也口張君房睽說云潛皖之水莫究其源山澗時
有仙花嘉蓮隨急雨流出辨可及千餘故白樂天
詩云太微星斗拱瑤臺聖祖琳宮鎮九垓天柱一

峰擎日月洞門千仞鎖雲雷玉光白橘香爭秀金
翠嘉蓮葉鬪開時訪左慈高隱處紫清仙鶴認巢
來○嶽志云蓮花峰下蓮子洞宋時有承局發蜀
中一道士托之寄書敲石少頃洞門自開一童子
引之入與麥三升為酬承局以薄已投之水已視
之皆金也○中朝故事云李德裕有親知授舒州
牧李謂之曰到彼郡日天柱茶可惠三數角其人
獻之數斤德裕不受明年精意求數角投之德裕
曰是矣此茶可以消酒肉毒乃命烹一甌沃於肉
食而閉之詰旦開視其肉已化為水○志云天柱

之北有左元放煉丹壇三所上壇有焙藥巖下壇
有丹竈遺址或云卽唐李抱朴築壇南岡之處有
左真人塔亦以左慈得名又自天柱之麓分其派
於東少南為真源宮其地蓋野人原也有梁時立
鶴石及白鶴丹霞二泉其石崖之巔有玉京叟張
虛靖題白雲閒似我我似白雲閒二物俱無心逍
遙天地間二十字大可徑二尺○李白江中望皖
公山詩竒峰出竒雲秀色含秀氣青冥皖公山巉
絕稱人意獨遊滄江上終日澹無味但愛茲嶺高
何由訪靈異默然遙相許欲往心莫遂待余還丹

成投迹歸此地。南唐錄云李中主旣割江北幸南都北望皖公山謂李家明云好青峭數峰不知何名家明獻詩對云龍舟輕颺錦帆風正值宸遊望遠空回首皖公山色翠影斜不到壽杯中。輿地志云唐畢誠遇異人指地以葬其父啓土丈餘得一石上乃鐫賦不知作者之名賦云九江之北三楚之南有潛山之峻兀聳孤峭之煙嵐萬丈藤蘿上公子之屏障千尋瀑布入漁翁之釣潭當其洞裡花繁山中景秀煙銷樹而香合石遶澗而玉糝地連天柱朝朝而霧起丹霞路接龍舒日日而雲生碧岫至若境勝名異人傑地靈有九天之聖廟竝三祖之儀形白鹿巖前幾世之香煙不絕綠蘿林外千秋之景色長青是以上砦窮旻下臨蕭寺當神仙聚會之處乃龍吟虎嘯之鄉拂銀河而舉袖星月滿衣仰桂影以板衣煙霞俱至峰連漢逼路與天分有滄霞之道士無逐鹿之將軍徑竹穿池孰解窺蟲學篆凌風擢秀余曾豹隱論文觀其高竝鴈門勢吞熊耳經霸楚拔而不動遇亂秦驅而不起白雲橫處瓊玉宛在潭中秋月圓時螺黛分明鏡裡爾乃畱此名山情幽思閒見蓬萊之

歷歷聽流水之潺潺負笈琴書似到桃源之洞兀
然回首如經函谷之關莫不截斷長川橫空一色
秋添旅思紛紛而葉落溪邊春引鶯啼嚶嚶而鴻
歸塞北幽徑行兮行不盡花木記兮記不得細看
松柏與藤蘿堪與良工圖水墨誠字在中偃師人
僑居舒州讀書縣之主簿山仕翰林學士得親幸
時人號爲禁中頗牧今縣南四里相公墩相傳卽
誠葬處口宋時懷寧驛墾地得石碑鐫詩云試將
潛皖問雲遊何似靈巖與虎丘應道淮南山水勝
清奇都在兩三州口宋張商英遊潛山寄子平詩
序略曰某與子平元祐癸酉會于舒州遂相與遊
潛山四月丁巳出松門遵松徑行十里而至靈仙
觀登正門半里許有泉出楓腹中點以明日名普
光明泉又百餘步登五雲亭更衣進謁司命天尊
于時峰巒歛氣雲雨借霽而會親之三峰閣出山
入譙門以別薄暮宿獨山驛巳未飯於龜泉感物
念昔作敘詩梗槩以寄云少年相別老相逢月滿
潛山照肺胸恩錄破除仙錄在世緣消盡道緣濃
尋思鈍鳥難如鶻欲擬天桃却是松九井共投青
竹簡誰知老子自猶龍口蘇長公集云柳子玉嘗

夢謂司命真君召已未幾果有監靈仙觀之命以詩送之曰世事方難猛更迴此身未老已心灰何時夢入真君殿也學傳呼觀主來又贈王仲素提舉靈仙觀云潛山隱居七十四紺瞳綠鬢方謝事腹中靈液變丹砂江上幽居連福地彭城爲我駐三日明月滿川同一醉丹書細字口傳訣願我沈冥真棄寘年來四十鬢蒼蒼始欲求賢救憔悴他年若訪潛山居慎勿逝人改名字其後孫莘老以致政王質以言事俱提舉本觀質采古今煉形攝生書撰寶元錄一百卷口舊錄云靈仙觀創自上古而命名則自宋世憶三代時錫則子乘龍至此堂下爲成湯講仙經今其地突高五丈或云漢武祭臺因其地五嶽祠王母池俱在左右口漢壇有二名曰丹仙曰拜嶽俱在吳塘善士坊內舊錄云樂長子齊人也少好道遇仙于霜林授以巨勝靈丸散方謂曰蛇服成龍人服成童年百八十歲顏如少女隱潛山號潛山真君唐明皇爲題像贊口唐大理司直陽壽記略云開元九年二月十五夜帝寢靈符殿夢來日九天使者降至午見雲端仙仗甚盛神曰吾爲九天使者受混元正真玉帝命

隨運采訪九天司命真君憩舒州潛山吾憩江州
廬山九天丈人憩蜀郡青城山可各為立祠乃遣
舒州為建祠卜地頃見二白鹿出岡頂遂於其地
立九天司命祠此真源宮之始也玄宗送玄洞真
人李抱朴謁司命真君祠詩云城闕天中近蓬瀛
海上遙歸期千載鶴春至一來朝采藥逢三秀
霞臥九霄參同如有旨金鼎待君燒口神異錄云
玄宗勅玄同先生諫議大夫李抱朴中官王越賓
賫御額為九天司命塑像初至忽殿後石壁裂中
有泥五色即取以竣事又云明皇夢入潛嶽見紫

翠間有井少憩亭上兼遣王越賓謝井錫名應夢
越賓詩云碧塢煙霞晝未開遊人到處盡徘徊憑
誰借問巖前叟曾托吾皇一夢來口香泥洞在真
源聖祖殿後前有大楓泉出樹中投錢取水洗目
能去翳口資治長編云太平興國七年懷寧縣奏
有老僧入萬壽山取寶掘得豨石刻誌公記云吾
觀四五朝後收丙子年趙號太平二十一帝云僧
忽不見州以石來獻六月甲戌詔舒州修司命真
君祠號靈仙觀真源舊錄云潛山司玄洞空邃可
容萬餘武石梯差差石闌礪礪可遊可止在天祚

宮西與瀑布亭相對今洞門半浸水中□輿地紀勝云天祚萬壽宮宣和中爲道士陳寶錄建修真其中大振玄教當時重之有同天門九龍井梁公飛龍二泉瀑布噴雪二亭府志九龍井風自井出四時皆北不生蚊旱時殺犬投井中卽降雷雨犬亦流出口志云皖山上有石床容百人俯瞰曠野瀑布垂於上九井收於下井深莫測俗傳誌公與白鶴道人爭山成隙道人設九厠于西以穢寺誌公以錫杖卓九孔于西山其風從孔出返穢氣于真源宮人呼爲九井西風此說似不經但土人云每夜風從九井起至沙河天曙方息□按九井謂龍雲雷風雨天葛洪煉丹應夢三牲也龍井在天祚宮前雲井在中雷風雨應夢葛洪俱在真源前後天井在下煉丹在桃源洞三牲在祭臺前又丹霞府有新泉後唐保大二年記□真源宮後四里巨石曰金鷄常有金色鳥棲其上故名州有劉姓者恒坐丹霞石上誦靈寶度人經一日有拉至金鷄石上看奕奕者與棋子令吞而化後有啓其殮惟履杖而已所謂劉度人也□寰宇記云三祖山卽潛嶽西山在真源宮右山有寺以山谷名寺相

傳梁寶誌大同二年與白鶴道人遊潛嶽愛山麓地勝咸欲得之武帝令各以物識地得者居焉道人以鶴止處爲記誌公以錫卓處爲記已而鶴先飛至麓將止忽空中錫飛先卓于地而鶴驚止他處遂各以所止築室今寺其遺址也隋三祖璨大師興有道場大業二年十月望立化樹下葬本寺後至唐天寶乙酉舒州別駕李常啟擴閣維之得五色舍利三百粒建塔南竇會昌中塔毀大中復建今山中有七塔舍利其一也皖山圖序云山谷寺西北有石牛洞洞前有七佛寺塔有卓錫泉有正祖上泓涪翁三亭詩巖酒島石盆諸勝又有石牛洞其石狀如青牛故名王魯直讀書其中因號山谷道人中有李公麟畫庭堅坐石牛像寺後有摩圍泉又號摩圍老人卽山谷別號後向子誼爲建涪翁亭銘而書之魯直六言司命無心播物祖師有意傳衣白雲橫而不渡高鳥倦而猶飛荆公六言水泠泠而北去山靡靡而旁圍欲窮源而不得竟悵望而空歸口劉貢父詩話云潘閔字逍遙爲詩有唐人風致因得罪匿舒州潛山寺爲行者題詩鐘樓云頑童趁暖貪春睡忘却登樓打曉鐘

團練推官孫僅見之曰此必逍遙也令寺僧呼之
已亾去○碑曰云山谷寺有璨大師碑房琯文徐
浩書有智禪師銘獨孤及文張從書碑陰記張彥
遠撰三祖大師偈包佶文○志云山谷寺石壁題
名如榜俗名石榜有云皇祐三年九月十六日自
州之太湖過寺宿與道人文銑弟安國擁火遊見
李翱習之書坐聽泉久之明日復遊刻習之後臨
川王安石按翱嘗爲舒州刺史集內有別潛山神
文○李師中留題云師中十一世祖唐御史大夫
諱棲術生丞相諱吉丞相生尚書諱德脩丞相諱
德倫尚書實師中八世祖也歷舒湖楚三州刺史
題名在此巖谷師中不肯忝備侍從坐阻邊議左
遷來守茲上永惟世業未墜于地後世子孫尚有
來者欲摩篆刻式昭前人熙寧四年十一月二十
四日尚書右司郎中李師中記按志師中楚丘人
知舒州有惠政改知瀛州去之日百姓擁道遮泣
馬不能行○吳塘陂在山谷寺前皖水所注徐師
川詩白水千丈瀑吳塘千頃陂卽此後人以篆文
鐫五言于石壁三國時曹公遣朱光爲廬江太守
屯皖大開稻田吳呂蒙曰皖地肥美若一收熟彼

衆必增如是數歲操態見矣於是權親征皖破之
此塘卽朱光所開按魏志揚州刺史劉馥開吳陂
以溉稻田又云呂蒙鑿石通水注稻田三百餘頃
里人祀之陂側□輿地志引漢書云潛縣天柱山
南面有祠其神聰亮百姓歲崇奠祭至隋懷寧令
辛公義移就皖水之陰吳陂里人號爲吳陂祠志
云吳塘出楊花鰕言楊花落塘中而魚正美也○
寰宇記云玉鏡山在縣北二十里唐貞元二年從
皖山東面忽然瀑裂皎瑩如玉行路遠見如懸鏡
然其年刺史呂渭奏聞因改萬歲鄉爲玉鏡鄉一
名玉照其東主簿山爲畢誠讀書處黃魯直詩有
云仙人持玉照畱在潛峰西指此也○志云天堂
山在縣東北百二十里四壁高峻中敞如堂其地
坦平可容數百武中有溫泉可浴又有龍湫及主
簿原諸勝○寰宇記云多智山在縣西北三百里
山高九百八十丈自壽州霍山縣西南入懷寧太
湖界西接蘄縣其山兩岸相去十里西北有水一
道入霍山縣界小山迤邐一百里連太湖縣東南
有水一道流入太湖縣界其山有茶及蠟每年民
得採掇以充歲貢秋夏時有毒蛇沙虱人不敢登

獸有猿猴木多松梓工巧所用諺謂之多智山○
 大江水去縣一百八十里與望江縣分界至皖口
 南對江州半江中流與彭澤縣分界東對石碑大
 江中流又與池州分界○潛水亦曰皖水有二派
 一曰後河自天堂龍山經烏石陂至縣東崩河下
 與前河合一曰前河自五河大口經吳塘陂分支
 流至縣西橫轉縣南名黑河正流遶縣北轉縣東
 達石碑皖石入江

太湖縣

在府西二百二十里

縣有太湖小湖陸鐘仰天黃里諸湖故有五湖之

目劉宋初置縣在太湖側因以為名號陰安城元
 嘉末以治居山嶮移就平原去舊縣三十八里齊
 建元初行臺左丞盧潛更修故太湖城立為龍安
 郡隋因晉熙郡之名立晉熙縣于此大業末李子
 通竊據之唐武德四年遣大使鮑安仁立為縣仍
 舊名○畿志曰太湖在縣西南今為陸所存者其
 名耳縣東四十里有小池今為驛或即小湖也其
 三湖已佚又云有太湖左縣在太湖東劉宋元嘉
 年建○水經注云晉泰始二年置縣在龍山太湖
 水邊水出縣西稻積山東南流入大江按名山記

有龍山崖在縣西三里石壁峭立下有龍湫水中
有釣魚磯石刻磨滅不可盡辨惟存波光照影肝
膽寒嵐氣逼人毛髮立凡十四字○志云縣南五
里良埠灣中有碁盤石出水丈餘相傳有仙人奕
碁其上○輿地紀勝云縣有懷玉寶積銀幢三山
而銀幢居縣北首三峰宛如畫圖○香茗山在縣
南三十里蓮花峰之次有梅福煉藥壇今縣物產
有茶或本此○西風洞在縣北十五里四面石壁
裂爲洞深九尺高四尺穴口濶五尺入內漸狹風
從上出草木不生六七月之間環縣數里無蚊○

輿地碑目云大中碑在縣北四面山唐大中十三
年建咸通五年修宋大觀中知太湖縣孫勰記畧
大中帝者唐宣宗也微時嘗避禍祝髮爲比丘週
遊天下築菴隱于此府志四面山在治西十里形
方而銳有古大中人王寺基塔尚存○紀勝云縣
北四十里荻藤巖昔有異僧張姓者居之出入恒
騎虎或有于巖上茹葷者百恠俱現必至驚墜○
又十里爲獨阜山上有石壁鐫隴西二字世傳李
白嘗避地於此志謂其山秀出以獨阜名又二十
里有百藥山絕巘深洞時聞異香昔高真人修煉

之所丹床石竈尚存懸崖有泉可愈熱疾○容齋
隨筆舒州太湖觀音院黃魯直曾宿焉作詩有云
汲烹寒泉窟代燭古松根相戒莫得至月黑虎夔
藩益用老杜課伐木詩序有虎必昏黑撐突夔人
屋壁所謂夔人者述其土俗耳本無觸抵之義蓋
誤用也按志觀音院在興化鄉爲金張二祖建又
云二祖建有二十寺在孝義鄉○志云安樂寺在
縣東三十里興化鄉有元尚書危素碑云寺去郡
百餘里地名豐溪宋宗寧演禪師建又云興化鄉
白雲山有會禪寺亦演師建其地林壑幽邃多石
菖蒲相傳唐時一僧夏月示寂梅樹下數里居人
聞花香者累日有亂石方塔卽演師遺蹟紀勝云
古之海會寺也又云有栲栳道場塔存今縣西門
真乘寺是其舊址○名山志云司空山在太湖縣
西北百六十里三祖璨大師當隋季往來山中十
餘載人無知者山上有傳衣巖□唐時司空山有
无相寺本淨禪師居之天寶中遣中官楊廷光入
山採常春藤廷光因詣寺訪師有契及歸以聞召
赴京師集諸耆宿說法論難帝及四衆莫不傾注
李白避地司空山詩南風昔不競豪聖思經綸我

則異於是潛光皖水濱卜築司空原北將天柱鄰
雪霽萬里月雲開九江春俟乎泰階平然後托微
身傾家事金丹年貌何長新所願得此道終焉葆
清真弄影奔日御攀星戲河澹一隨王喬去長作
玉天賓今山有太白書臺卽司空原也○志云司
空山週圍四十里有清泓在半山曰洗馬池謂之
司空源山有石曰馬牛曰鷄心穴曰雷洞嶺曰小
鴉俱稱險絕人跡罕到○司空山西北二十里望
夫隘之旁南五里青麻巨石之上界有白線三道
長者二十一步短者十八步俗呼爲公輪墨痕○

安撫寨在司空山宋亡時安撫張德興與縣人傅
高立寨山上以圖恢復初德興與劉源等起兵傅
高應之遂復黃州壽昌軍用景炎正朔與元人相
拒十餘年鄂大姓多從之軍勢頗振會元遣昂吉
兒襲司空山寨寨破德興高應被殺執德興三子
以歸按寨上舊立五門曰太平曰歡喜曰朱砂曰
前部曰後部今後部河之名本此○城塚記曰陰
安故城在桐城縣東南一百八十里卽宋書晉熙
郡陰安縣也又云梁以陰安改屬樅陽郡隋開皇
三年罷今屬縣界○廢青城縣在縣東四十里按

魏書武帝遣將軍曹仁修築至初元年廢唐武德四年大使鮑安仁復置七年廢屬荊陽縣○廢東陳縣在縣東四十四里齊高帝建元二年行臺左丞盧潛置至陳大建五年廢

宿松縣

在府西南二百一十七里

本漢皖地元始中立松滋縣晉平吳以名重荊州屬邑改曰宿松隋改置高唐郡尋廢爲縣復名宿松志云漢置仙田縣于此今治北三十八里故縣橋處有斷碑可摸○漢末松滋令有張何丹初仕中散大夫以忤王莽出爲松滋令愛民如子有嘉

承連穎之祥卒於官百姓爲之哀慟立祠葬在今

治西南五里長安埠河邊小山卽何丹山也其地

有佛子嶺嶺有石裂爲三如梵其色溫潤相傳有

高僧卓錫所成名三台石○李白本傳安祿山反

轉側宿松匡廬之間其時宿松令有姓閻丘者白

贈之詩云阮籍爲太守騎驢上東平剖符十日間

一朝風化清偶來拂衣去誰識主人情夫子理宿

松浮雲知古城掃地物莽然秋來百草生飛鳥還

舊巢遷人反躬耕何慚宓子賤不減陶淵明吾知

千載後掩却二賢名○羅隱晚泊宿松一首解纜

隨江流晚泊古淮岸歸雲送春和繁星麗雲漢春
深胡鴈飛人噴水禽散仰君邈難親沈思夜將旦
又贈宿松令傅堅詩江離漠漠樹重重未過長淮
到宿松縣好也知臨皖水官閒應得看潛峰春生
綠樹吳歌怨雪霽平臯楚酒濃畱取餘波待張翰
明年歸棹亦從容○一統志云小孤山在縣南一
百二十里江北岸孤峰峭拔與南岸山對峙如門
江流束其中湍激迅撼稱最險處本朝成化中江
水忽分流于山之北小孤一峰屹然中流宋劉敞
詩驚波觸南岬反怒射北壁蒼山與相排所謂小
孤石蟠根萬仞淵聳角百丈碧祠堂豁精嚴行旅
進粉澤吾欲爲小孤作書解嘲客元揭傒斯詩小
孤山前一迴盼蒼然如識孤山面隔江疊嶂開翠
屏絕壁浮雲飄素練大江東匯彭蠡來晝夜崩騰
奔海甸笳鼓遙聞日月動帆檣忽度乾坤轉舟人
不識造化奇朝暮每趁南風便天昏一火明半山
石底猶疑有雷電彭郎磯下寒濤湧坐客正說龍
君傳人生可喜還可憐世事堪違不堪戀○小孤
北岬與江州彭澤接界山之西有小孤廟對岬有
彭浪磯語訛爲彭郎遂有小姑嫁彭郎之語後人

又起梳粧亭以附會之口小孤估客曲云百里見

茲石小孤信自孤特矜水中態緬與他峰殊又祇

應誤一字便解小姑羞雲開粧鏡石水拂蛾眉洲

又平過小孤石穩度馬當山前途何處險湖口有

新關又與君欲相別湖口是總路君過彭蠡湖我

向潯陽去又莫作江中馬朝朝無人賈但似舟中

鷄夜夜逐村啼右五解佞以萬曆甲辰歲過小孤

而作輿地紀勝云縣東北七十里龍門山寺即

乾明寺也寺有龍巖龍潭瑞柏之異不敢置木魚

置則常感變恠有南唐徐騎省碑文按志在恭化

上鄉靈泉觀梁時匡阜真人建靈隱寺唐馬祖

大師建按即畿志所載縣北三十里之靈隱山也

其地又有嚴泰山高五十餘丈橫亘十餘里產蒼

木意唐德武初立嚴州取義於此寰宇記云桑

落洲在縣西南百九十里江水始自鄂陵派爲九

於此合流謂之九江口初盧循反劉毅征之發自

姑孰時循欲先寇江陵有敎之曰毅兵重宜併力

攻之若剋建康則江陵可傳檄定耳從之戰于桑

落洲毅果大敗覆沒甚衆此洲與潯陽郡分中流

爲界郡國志有烽火山南北割江爲界戰爭不

息烽堠無常此山高敞可以瞻望故名北史齊永
明年置堠于縣東北六十里卽此山也○龍南蓮
箬湖在縣南五十里其水爲白荆洿池三十六段
接大伯澇湖合張富池而下入望江縣出雷港而
達于大江○鰾湖在縣西南八十里湖水廣濶產
鰾魚甚大且佳○塚記云縣北三十里有周公瑾
墓又四十里有梁昭明墓墓有石臺高百餘丈名
分經臺縣西三十里有唐西平王墓按人物志周
本宿松人瑜之後趨勇過人能手格猛虎從楊行
密每戰必先登莊宗聞其名召爲雄武統軍後拜

太尉封西平王子剡官廬州刺史

望江縣

在府西南
百二十里

沈約宋書云晉安帝立新冶縣屬晉熙郡亦爲大
雷戍註曰西岸有大雷江自潯陽柴桑沿流三百
里入新冶界陳天嘉中於此置大雷縣隋改曰義
鄉唐武德初始易望江之名○志云縣治郭璞指
建自七里岡分三壠相挾而馳右爲南臺山左爲
周何山縣治山居中昂首而向江故曰望江按周
何山距治東一里以周瑜何无咎皆嘗立功當縣
後人祀之山下故名南臺山去治西五十里有南

臺寺寺有放生池其傍有錫類亭宋淳熙年建○
唐登科記云貞元元年進士擢第吳人麴信陵爲
望江令六年亢旱麴令精虔祈禱鏤鐵爲文沈於
縣南二里龍潭中澍雨立應及當受代民遮留之
不得去後卒于官廣柳將就道復攀轅號泣留葬
于縣市北隅號曰麴大夫墓爲立祠焉白居易詩
我聞望江縣麴令撫惇嫠在官有仁政名不聞京
潛至今道姓名男女涕皆垂○寰宇記云大雷池
水自宿松縣界東流二百餘里經縣界東南積而
爲池謂之雷池又東流經縣南入于江百里爲大

雷口又有小雷口晉成帝咸和二年蘇峻反陶侃
在江州温嶠欲下衛京師庾亮素忌侃報嶠書曰
吾憂西陲過于歷陽足下無過雷池一步齊鮑照
集有登大雷听與妹書皆此地○孟宗宅在縣北
一里志云縣西北山阜是穹起若臺又曰孟宗臺
有竹一畝相傳卽其泣筍處按宗字恭武江夏人
事母至孝嘗爲望江雷池監自能結網取魚作鮓
寄母母還之曰汝爲魚官而以鮓寄我非避嫌也
亦見興國州富池下○王祥池在縣西南二十里
綱目集覽云池雖極凍其中如有人臥形按集覽

元時望江縣人王幼學作世所稱慈湖先生也祥
字休徵臨沂人漢末遭亂攜母及弟覽避地廬江
隱居三十年不應州郡之命冬月恒臥冰得魚以
養母今望江屬皖皖在漢爲廬江郡志謂池在縣
埠南岸有小沼徑圓可六七步○唐貞元中徐仲
源家于縣北十五里孝義墩仲源生而仁孝割股
爲饌以愈母疾縣令麴信陵以聞勅所居號昭賢
里而旌其門後第進士爲合肥令母性畏雷葬于
宅東南隅每陰晦震電輒先至塚上呼曰仲源在
此○志云值雪山在縣西十八里相傳李白避亂

憩山中于此遇雪故名山半有白晝堂及幽大師
真身師以唐大順中入山修行十二年出入恒跨
虎後坐化山中○大茗山在縣北六十里有石廣
數丈其平如砥唐末羅隱昭諫嘗結廬焉又有小
茗山東西相向其傍爲鷓鴣山蘆新港馬頭河二
水發源于此○志云縣南五里楊溪長河三十六
斷之總河也東流至雷港口入江又有漳湖泊湖
武昌青草白土諸湖正鮑明遠大雷岸書所云北
則陂池潛演湖脈通連苧蒿攸積菰蘆所繁棲波
之鳥水化之蟲智吞愚彊捕小號噪驚聒紛乎其

中者也

廣德州

直隸南京

領建平一縣

春秋桐汭之地哀十五年楚子西伐吳及桐汭是也漢為故鄣縣地前漢書謂鴻嘉初封中山靖王勝之後雲客於廣德國是為中山夷王無子國除

○水經注曰漸江北歷黟山縣即黟縣也成帝以為廣德國封孫雲客王於此晉太康中以為廣德縣按州志云光武中平一年分置廣德縣屬丹陽郡孫吳呂蒙曾領廣德長○劉宋合五縣地立綏安縣廣德與馬梁分綏安置石封隋省入綏安而縣地始廣唐於是置桃州或取古語綏山一桃之

義州尋廢仍改綏安爲廣德縣宋陞軍元陞路國朝初設府後改爲直隸州○圖經云廣德地錯諸州其實偏僻民醇事簡號爲江東道院按州東界浙江湖州府之長興縣三十里南界安吉州六十里北界應天府溧陽縣七十里故漢屬丹陽及故鄣宋屬吳興南唐屬昇州西界寧國府之宣城故漢爲黟地六朝至唐屬宣城郡○韋應物送趙隨廣德尉詩明經有清秩當在石渠中獨往宣城郡高齋謁謝公寒原正蕪沒夕陽自西東秋日不堪別淒淒多朔風由此詩觀之則廣德在唐自屬

宣州○杜元愷註左傳曰廣德縣西南有桐水出白石山西北入丹陽湖寰宇記云桐水在縣西北二十五里源自白石北流入宣城縣之白沙川乃入丹陽湖州志云楚子伐吳見桐花隨溪流下故名桐汭然于義無考今桐水溪實去州治南八十里發源桐山○輿地紀勝鼓角樓碑曾鞏子固之文也其畧云廣德爲吳西疆故鄣之墟境大壤沃以附在宣州道路四阻太宗在位四年乃因縣立軍使得專決奏事體如大邦而門閔庫隘樓觀弗飾治平四年吏部員外郎知制誥錢公輔爲守將

新之會駕部郎中朱壽昌來繼任乃作新門鼓角樓云○軍治後有秀遠亭在翠竹綠疇之間地勢高爽故陳天麟有笋槩秧針入圖畫令人魂夢到家山之句○郡圃有古梅一株枝柯蟠屈姿態竒古太守趙希仁嘗圖以獻既又刻石於玉溪堂中按今墅橋步左右是古梅迹○范公亭在司理院宋朝言行錄云太中祥符間范仲淹爲司理參軍起亭於廳事東南時時引囚訪問以得情爲主日抱牘與守爭守盛怒臨之范不爲屈退必錄其在復辯論之語于屏屏爲之滿及去官貧只一馬乃

鬻之徒步而歸後守孫覺莘老爲詩云蕭蕭獄曹畔有亭名范公歲月益以久父老傳清風維時狴牢下枉直情畢通太守異趣舍挺然不回從事事爭救之粉屏記其終殆公三年歸字滿無所容官小俸祿薄家貧恒屢空賣馬以自給徒行氣彌充志云有范公井希文所穿○州舊無城宋淳祐六年太守趙希仁僅設子城于內其外樹門六日清霜日南薰日先春日朝陽日夜光其一或云卽石溪也紀勝云西清霜門玉溪上跨獅子濯纓西城三橋又有清容堂太守錢公輔爲清容先生筮溪

築在城西潑字道源力學隱居太守築室延之以
誨後進其孫名揆舉進士與毗陵張汝舟齊名○
橫山在州西五里高出羣山之中四望皆橫故名
上有太守梅詢所建攀蘿亭集仙臺詢以翰林學
士天聖中出守此有詩寄後守王渙云我有集仙
經始在勞君到日爲重修益以臺爲托也臺基當
山絕頂爲張王興迹之地又嘗禮斗於此亦呼禮
斗臺宋岳武穆屯兵其上賦詩刻石○顏真卿橫
山廟碑在縣西五里大略謂神生漢代卽張安世
也廟食茲山久新室之亂爲野火所隳建武中復
構唐興封廣惠王祠在橫山亦呼爲祠山云○王
象之以古碑謂神張姓諱渤顏碑謂是張安世攷
安世湯之子也居杜陵有孫名勃當漢元朝仕爲
散騎封平原侯而娶之石門行宮率稱張車騎或
因其名與官而傳會之耶○四明圖經有張王廟
碑高間爲文謂王武陵龍陽人生於西漢之末東
遊吳會居苕霅之白鶴山而祠山行狀碑謂神東
清河人曾祖考諱秉神諱渤西漢時生于吳興烏
程縣之橫山其所載互異有如此者○國朝慎蒙
廣德紀游云從吳興西行九十里至長興之銀埭

舟行過四安又陸行五十里至廣德出西門三里
有廣惠殿榜殿高計九丈以沈香雕神像甚竒怪
面色似經煙火虬髯如鐵祝史謂是海馬驥乃水
神也像有袴乃元天曆二年製布爲之至今不朽
太祖龍興時嘗來登謁有詩云天下英靈第一山
白雲爲闕石爲關高臺近斗當空出老樹如龍挾
兩還兵革累經香火舊鬼神常護道人間從軍幸
得來瞻此麾指干戈動笑顏□山泉逸志云廣德
祠山有七寶曰銅印一宋端平元年鑄文祠山廣
惠廟印□玉磬一長尺五寸有竒高七寸厚半之

刻曰宣和殿寶篆文也玉質似雪無玷□徑寸珠
一擎以鐵梗飾以水晶狀如線版水晶上有金屏
屏綴小金龍作槍珠態珠遠望桃花色或現青淺
內有粒如粃者三流動閃閃以兩指按之其色微
黃若貓睛然兩人對照亦可互見其面以字映之
無論多寡畢入照中又一青衣小童僅如綠豆而
搖頭舞袖酷類傀儡正德間內使畢真獻之內庭
嘗于禁中作祟已詔還山□趙子昂真蹟一乃重
修寶閣方丈疏也字彷彿李北海稱當時名物□古
畫仙圖一爲韓湘子呂洞賓呂雙目能左右視炯

炯逼真韓袒裼仰視鷄懸萬端不知何以下筆右
二指執花如撮極其輕揚左繫籃籃有折枝所謂
頃刻花也筆意類吳道子○菜花百雀圖菜只一
本而花以百數當衆卉競秀展之其色如新雀圖
懸之靜室則下而啄食屢爲道士窺見○右山泉
先生得聞之道士如此又言當時有玉一方周正
如几日光照之內有詩四首可讀乃白玉蟾所點
化者爲一州守密令其西席延交道士日久借入
衙齋不復返云○蹇忠定公義碑云大凡名山所
藏廣大悉備第畏神之英靈不敢竊發所謂雷之
布鼓登之鬼市與夫河源池丘之神債廣德祠山
之埋藏是謂天下四異非妄傳也蓋道士與慎公
言珠玉由掘地而得信然○廟記云祠山神以二
月八日誕七日必風九日必雨相傳誕神延其小
姨飲必風雨者欲以露其足爲樂雖涉虛妄然風
雨不爽○祠山麓有黃原采墓黃巖王叔英也國
初以翰林修撰寓廣德聞靖難兵起欲募壯士入
衛不果遂沐浴具衣冠自經衣裾中得詩其略云
有志未及竟竒疾忽見纏當念夷與齊餓死首陽
巔周粟豈不佳所見良獨偏高蹤遠難寄偶爾無

足傳事平詔治奸黨二女赴水妻斃于獄○巖頭山去州西四十里兩山屹立如關門中夾一溪南山之水皆滙于此而後入建平溪○志云金井在南門以 乘輿嘗幸其傍飲水水清冽故名金而城門曰兆符門也城南十里有丹井山昔徐真人依此井燒丹仙去又五里爲竹山有竹山寺溪流遶之多篁竹水泉之勝又爲方山牛首山俱以其形似而名又五里爲笄山中峰最高左右雙峰端列蔚然森秀州南門子城三峰樓其名本此宋紹興間李泰定題曰一川花柳擁雕欄濃綠浮空四面山便欲移家來此住不將姓字落人間○三峰之左有鷹山絕巘一石卓立高十餘丈如鷹嘴然下有深窟容百餘人○又三十里爲金鷄山山下有洞每陰晦之夕輒有火光自洞出居民多見之曾有金鷄往來迴翔於洞中○又十里爲靈山泉石甲於一郡有廣瑞禪院及龍王廟文殊巖普賢臺羅漢洞山水合流而出滙爲丁公潭逕迤數里前後有巨石平廣數十丈瀑布下垂望之如機絲然宋葛勝仲長短句云法會何曾散此地神光滿丁公潭下自雷霆疑是銀河挽下一齊傾○石溪

門今之東南門也有乾溪山去城三十里峰巒疊出卓立天外一水遶山白石齒齒故名乾溪宋范仲淹石溪瀑布詩迥與衆流異發源高更孤下山猶直在到海得清無勢鬪蛟龍惡聲吹雨雹初晚來雲一色詩句自成圖其西有一山鑿石數百級至頂約高百餘丈名石雲梯○又二十里爲石鼓山絕頂有石如鼓下有石如架鼓狀相傳天每陰雨石鼓自鳴○近石鼓有石嬾山衆山環遶惟此獨高其巔有石高二丈窈長如嬾人藤蘿爲衣而不蒙面志云舊傳謝氏女介潔有守登山化爲石

只今樵者不敢近○又十里有桃山春時開花如錦繡然或云唐置桃州取此山上有金牛及牧童足迹○先春門今之東北門也州城東北故鄆城漢縣屬丹陽郡去長興縣西南八十里東漢分故鄆之南鄉置安吉縣皆此地今州東北四十里有東泉寺唐天祐間建北去寺十里有馮家洞名山記云卽荆山洞也雖小而能竒石鏤方廣若門舉火入洞黝澱不可辨約里許見天光射上開圓孔若井口復漏小影宛如星月洞門有方丈峭壁可壟而大書○大洞在城東北七十里洞口如厦屋

四五間容千人石乳垂四壁若蠹房鶴膝白如玉
苔蘚間之得日光返照如繪又如大綠金相非人
世有洞左一白石直下如柱玲瓏奇瑰又如鰲足
擊之轟然名曰石鼓進可五六十步有石橫亘如
列屏若與外隔者中有白石大士人工也至此洞
路始分由西入則弘敞若樓臺石皆削平又進則
高且窪如螺末漸窄有刻咸淳年號題名如新有
仙田大小十二段經畫斬然又進而空濶中瑩若
黑漆有白石結成如雲而成象者有鐘懸者有磬
覆者有蓮垂者又如白布數十疋而紋理粲然者

有白石蹲踞名鹽堆堆北有如人形名賣鹽老左
竇山舍一白石長可七八尺由大而尖如人舌特
伸於外其上皆結成龍形首尾交互雜見凡三四
有題云地肺開天竅行行人洞玄片雲孤鶴下誰
見此中仙又進則石壁橫塞若無路北一小竇旋
折尺餘如半拱僅可容一人人名曰銅關有石橋
亘其下瀑流積水不可涉其中宛然一方丈四面
純白色間桃紅若羊脂玉若雉子斑絢爛奪目有
石磬有珠簾有大小雪洞愈入愈不可窮云與太
湖相通○銅關之外有二洞其西洞口有橋橫亘

如銅關澗水潺潺名曰仙橋高約五尺轉折一所名燕巢廣丈有奇深可二百丈高可一丈石罅中白石下垂如鰲足者若肝聯者肺附者若覆鐘懸磬者又有仙田一二十畦其東名黃河洞深廣殺西洞三之二高倍之有石偃僂如人其色若甘草紋若米糝北復垂一石中分而上聯奏之名曰米堆乃轉而北又如螺頂高可二十丈突生白色類牛頭下垂者二鼻角種種具存進百步許爲龍潭深不可測可以舟此洞之南又有小洞深廣約四丈僅容十人暖如烘上下如砥可以布席○相近

金牛嶺亦有洞四面皆重山中有一嶺長亘十五里舊傳異僧馭一金牛過此牛入洞不出僧乃立化洞口爲石遇夜陰晦則有天燈見○朝陽門今之迎春門也志云浴兵池在州東二十里亦名東亭湖祠山古碑云王每役陰兵由長興導流欲抵廣德東自荆溪疏鑿聖瀆長五十里至本州之青林塘界於岍側先開浴兵池方三十餘頃尋廣聖瀆之岍迤邐而西至杜坑廟尚欲鑿三十里以爲通津先於後村畢宅保小山楓林中掛鼓與夫人龐西氏約每餉至鳴鼓三則白來赴母請也百鳥

啄鼓上王來餉尚早乃復去已餉至夫人鳴鼓王
猶以爲鳥也遲之夫人乃躬詣見大猗方役陰兵
開鑿乃呼王王耻之遂輟是役而不見夫人王象
之謂東亭湖爲張王廢迹者固此耳○夜光門今
之闕武門也舊鷄林驛梅花橋皆在夜光門外○
宋有張介隱居城北林亭雅勝密邇梅花橋橋傍
梅樹多奇古以之得名紹聖間右正言孫諤守是
邦嘗攜酒造焉與介唱酬有竹林藏月讀書家之
詠○州北二十五里釣魚臺唐張志和隱居之處
臺下有澄潭藤蔓遶磯松篁夾水至今可辨○又
五里有唐興寺劉文靜捨宅爲之寺前劉相公廟
祀文靜也其夫人又捨建中娥橋○州北靈佑鄉
有鎖山寺唐慶雲院宋萬壽院也又有聖感寺唐
天寶中廣德令徐晃捨宅所造○白佛祠在州北
七十里五花巖上橫列百峰高三百丈祠在最高
峰頂石壁上有天寶年號右已上俱夜光門外○
碑曰云廣德軍桐汭志郡守趙亮夫序○金沙寺
壁記宋岳飛題云余駐大兵宜興沿幹王事過此
陪僧謁金仙徘徊暫憩遂擁鐵騎千餘長驅而往
然後立奇功殄醜虜復三關迎二聖宋朝再振中

國安疆他時過此得勒金石不勝快哉建炎年四月十二日河朔岳飛題

建平縣 在州西北九十里

宋朝會要云端拱元年以廣德縣之郎步鎮置建平縣今縣前有水曰郎溪是也○縣有大溪山圖經曰卽桐山也九域志以白石山一名桐源山在廣德軍西南八十里白石水流至州城西北謂之桐川水流入縣界○縣東南有白石澗上接桐川下合郎溪以源出白石山故名紀勝有南崎湖在縣西十里承桐水之下流也○紀勝云縣東北有

大濤山其山多松每長風怒吼輒作波濤之聲故名又有大山山頂有池冬夏不竭天聖中有磊石君示現於此按卽畿志所謂大磊山也在縣南八十里一峰特起頂有三石如品字又十里爲鴉山有一石高二丈許上有彈丸迹百餘呼爲彈子石又有釣臺皆古仙遺跡物產志云鴉山產茶美入貢宋梅詢爲守有茶煮鴉山雪滿甌之句○畿志云伍員伐楚還吳駐馬伍牙山騎而渡馬所履迹因而成川今馬履澗是也在城東北三十五里又五里卽伍牙山上有子胥祠祠側有潭可以雪禱

○縣西故城二曰浮曰諸葛咸廣數畝容數千人
居近葛城里許復有驢城馬城有井數十口皆昔
人屯兵之所○浮城中有古樹莫能名斧之則淋
漓如血其地極窪每夏潦暴漲諸圩悉沒惟此城
巋然似浮在水○六朝時有高封周陳氏之外戚
也其故宅中有八角井九曲池土人謂井有藏金
相與取之水輒沸湧不得下隱隱聞有笙簫之聲
乃止○縣西十里夏侯冢有碣陷土中露其巔而
無款識此十里有茅王墓廣袤數里履之則逢然
有聲冢中多蛇人不敢窺去墓里許卽茅王廟

律